

提婆菩薩釋楞伽經中外道小乘涅槃論

元魏三藏法師菩提流支譯

問曰何者外道所說涅槃答曰外道所說涅槃有二十種是外道等虛妄分別如是等因能生六道如來爲遮是等邪見故說涅槃因果正義何等二十一者小乘外道論師二者方論師三者風仙論師四者韋陀論師五者伊闍那論師六者倮形外道論師七者毗世師論師八者苦行論師九者女人眷屬論師十者行苦行論師十一者淨眼論師十二者摩陀羅論師十三者尼捷子論師十四者僧佉論師十五者摩醯首羅論師十六者無因論師十七者時論師十八者服水論師十九者口力論師二十者本生安荼論師 問曰何者外道說諸受陰盡如燈火滅種壞風止

名涅槃答曰第一小乘外道論師說 問曰何等外道說方名涅槃答曰第二外道方論師說最初生諸方從諸方生世間人從人生天地天地滅沒還入彼處名爲涅槃是故方論師說方是常名涅槃因 問曰何等外道說風爲涅槃因答曰第三外道風仙論師說風能生長命物能殺命物風造萬物能壞萬物名風爲涅槃是故風仙論師說風爲常是涅槃因 問曰何等外道說梵天是涅槃因答曰第四外道韋陀論師說從那羅延天齋中生大蓮華從蓮華生梵天祖公彼梵天作一切命無命物從梵天口中生婆羅門兩臂中生刹利兩髀中生毗舍從兩腳跟生首陀一切大地是修福德戒場生一切華草以爲供養化作山野禽獸人中猪羊驢馬等於界

場中殺害供養梵天得生彼處名涅槃是故  
韋陀論師說梵天名常是涅槃因 問曰何  
等外道說不見分別見常無常是涅槃答曰  
第五外道伊餘那論師眷屬作如是說伊餘  
那論師尊者形相不可見遍一切處以無形  
相而能生諸有命無命一切萬物名爲涅槃  
是故伊餘那論師眷屬作如是說伊餘那是  
常名涅槃因 問曰何等外道分別見種種  
異相名涅槃答曰第六倮形外道論師說  
問曰何等外道說見一切法自相同相名涅  
槃答曰第七外道毗世師論師作如是說謂  
地水火風虛空微塵物功德業勝等十種法  
常故和合而生一切世間知無知物從二微  
塵次第生一切法無彼者無和合者無和合  
者即是離散離散者即是涅槃是故毗世師

論師說微塵是常能生一切物是涅槃因  
問曰何等外道說身盡福德盡名爲涅槃答  
曰第八苦行論師說 問曰何等外道說自  
性人命轉變名涅槃答曰第九外道女人眷  
屬論師說摩醯首羅作八女人一名阿提儼  
二名提儼三名蘇羅婆四名毗那多五名迦  
毗羅六名摩菟七名伊羅八名歌頭阿提儼  
生諸天提儼生阿脩羅蘇羅婆生諸龍毗那  
多生諸鳥迦毗羅生四足摩菟生人伊羅生  
一切穀子歌頭生一切蛇蠍蚊蟲蠅蚤蚰蜒  
百足等如是知者名爲涅槃是故女人眷屬  
論師說女人是常名涅槃因 問曰何等外  
道說罪福盡德亦盡故名涅槃答曰第十外  
道行苦行論師說 問曰何等外道說煩惱  
盡故依智名涅槃答曰第十一外道淨眼論

師作如是說 問曰何等外道說見自在天  
造作衆生名涅槃答曰第十二外道摩陀羅  
論師言那羅延論師論我造一切物我於一  
切衆生中最勝我生一切世間有命無命物  
我是一切山中大須彌山王我是一切水中  
大海我是一切藥中穀我是一切仙人中迦  
毗羅牟尼若人至心以水草華果供養我我  
不失彼人彼人不失我摩陀羅論師說那羅  
延論師言一切物從我作生還沒彼處名爲  
涅槃是故名常是涅槃因 問曰何等外道  
說衆生迭共因生名涅槃答曰第十三外道  
尼犍子論師作如是說初生一男共一女彼  
二和合能生一切有命無命等物後時離散  
還沒彼處名爲涅槃是故尼犍子論師說男  
女和合生一切物名涅槃因 問曰何等外

道說證諦道名涅槃因答曰第十四外道僧  
佉論師說二十五諦自性因生諸衆生是涅  
槃因自性是常故從自性生大從大生意從  
意生智從智生五分從五分生五知根從五  
知根生五業根從五業根生五大是故論中  
說隨何等何等性修行二十五諦如實知從  
自性生還入自性能離一切生死得涅槃如  
是從自性生一切衆生是故外道僧佉說自  
性是常能生諸法是涅槃因 問曰何等外  
道說有作所作而共和合名涅槃答曰第十  
五外道摩醯首羅論師作如是說果是那羅  
延所作梵天是因摩醯首羅一體三分所謂  
梵天那羅延摩醯首羅地是依處地主是摩  
醯首羅天於三界中所有一切命非命物皆  
是摩醯首羅天生摩醯首羅身者虛空是頭

地是身水是尿山是糞一切衆生是腹中蟲  
風是命火是煖罪福是業是八種是摩醯首  
羅身自在天是生滅因一切從自在天生從  
自在天滅名爲涅槃是故摩醯首羅論師說  
自在天常生一切物是涅槃因 問曰何等  
外道說一切物自然而生名涅槃答曰第十  
六外道無因論師作如是說無因無緣生一  
切物無染因無淨因我論中說如棘刺針無  
人作孔雀等種種畫色皆無人作自然而有  
不從因生名爲涅槃是故無因論師說自然  
是常生一切物是涅槃因 問曰何等外道  
說物皆是時作名涅槃答曰第十七外道時  
論師作如是說時熟一切大時作一切物時  
散一切物是故我論中說如被百箭射時不  
到不死時到則小草觸即死一切物時生一

切物時熟一切物時滅時不可過是故時論  
師說時是常生一切物名涅槃因 問曰何  
等外道說見有物名涅槃答曰第十八外道  
服水論師作如是說水是萬物根本水能生  
天地生有命無命一切物下至阿鼻地獄上  
至阿迦尼吒天皆水爲主水能生物水能壞  
物名爲涅槃是故外道服水論師說水是常  
名涅槃因 問曰何等外道說見無物名涅  
槃因答曰第十九外道口力論師說虛空是  
萬物因最初生虛空從虛空生風從風生火  
從火生煖煖生水水即凍凌堅作地從地生  
種種藥草從種種藥草生五穀從五穀生命  
是故我論中說命若是食後時還沒虛空名  
涅槃是故外道口力論師說虛空是常名涅  
槃因 問曰何等外道說見有無物是涅槃

因答曰第二十外道本生安荼論師說本無日月星辰虛空及地唯有大水時大安荼生如雞子周匝金色時熟破爲二段一段在上作天一段在下作地彼二中間生梵天名一切衆生祖公作一切有命無命物如是有命無命等物散沒彼處名涅槃是外道安荼論師說大安荼出生梵天是常名涅槃因

提婆菩薩釋楞伽經中外道小乘涅槃論

音釋

蝕乘力切 裹古火切 廁初吏切 腳居勾切 傲  
侵虧也 奴鉤切 乃管切 火氣也